



La signuna ed ils signuns che han retschet per lur caschiel la nota maximala da 20 puncts.

FOTOS G.N. STGIER

Darar in uschè bun chaschiel

Plantahof: Premaziun dal chaschiel d'alp

DA GION NUTEGN STGIER / ANR

■ **Otg alps han retschet il predicat excellent per lur chaschiel. Grazia a la blier'erva han las vatgas dà dapli latg, uschè ch'ils signuns e las signunas èn betg mo contents cun la qualitad, ma bain er cun la quantitad.** La premiaziun chantunala dal chaschiel è en tuts cas blier dapli che be ina punctaziun d'in product. Na, la premiaziun al Plantahof è in inscunter empernaivel da signuns e signunas, da l'autra pastreglia e dal purs da l'entir Grischun. Da las 720 alps che nus avain en noss chantun èn 120 alps da vatgas, nua ch'i vegn er fatg chaschiel. Er questa stad han ils signuns e las signunas fatg bunamain 600 tonnas chaschiel, quai ch'èn radund 100'000 magnuccas. Tiers il chaschiel vegn lura er anc fatg vers 75 tonnas paintg sin las alps da vatgas.

1200 umens e dunnas

Sin las alps da noss chantun passentan la stad 1200 umens e dunnas ed indemniada vegn la pastreglia cun radund 15 milliuns francs. Cun chauras e nursas èn

var 120'000 animals trais mais sin las alps e da quella summa èn 15% animals da purs da la Bassa. Singular è bain che 20% da la surfatscha dal Grischun èn alps, ellas che appartegnan a las vischnancas, a las corporaziuns d'alp ubain a persunas privatas e schizunt a claustras.

90 alps èn sa participadas

A la premiaziun da chaschiel èn sa participadas signuns e signunas da 90 alps e quai èn quatter dapli che anc avant in onn. Lur duas magnuccas che dateschan da la segunda mesadad da fanadur han ils experts valità tenor quels criteris: gust ed aroma cun dieschs puncts, pasta cun sis puncts, consistenza e perfuraziun cun dus puncts e lura pareta er cun dus puncts. La nota maximala ch'ils sis experts han pudì dar al chaschiel è pia 20 puncts. Avant in onn avevan quatter alps retschet la nota maximala e quest onn èn quai schizunt otg alps. Quai èn las suandantas alps: Naustgel, Sumvitg; Russein, Mustèr; Larein, Jenaz; Uina Dadaint, Sent; Maran, Cuira; Sattel, Zezras; Kleinguraletsch, Val S. Pieder;

Peil, Val S. Pieder. Sco gia avant in onn ha la signuna *Petra Kienzle* da l'Alp Russein er quest onn retschet per ses chaschiel la nota maximala da 20 puncts. Quai è dentant er il cas tar *Felix Tanner* da l'Alp da chauras Kleinguraletsch a Val S. Pieder.

59 alps cun il predicat fitg bun

Gist 34 alps han retschet la nota da 19.75 puncts, vul dir il predicat fitg bun. Da quellas 34 alps sa chattan nov en Surselva, sis en il Grischun central e quatter en l'Engiadina Bassa. 25 alps han er survegnì il predicat fitg bun per lur caschiel, dentant «be» 19.50 puncts. 26% da las alps (total 23 alps) che han laschè valitar lur chaschiel han retschet il predicat bun. La media dals puncts è tar 19.55 puncts, quai ch'è ina media fitg auta. Avant in onn per exempel era la media dals puncts tar 19.45 puncts. Suentar che *Curdin Foppa* è i avant in onn en pensiun sco manader dal post da l'economia d'alp è *Töni Gujan* stà responsabel per l'organiziun da la premiaziun dal chaschiel.



Il president dals purs grischuns, l'organisatur da la premiaziun da chaschiel ed in pur da Salouf. (da san.) Thomas Roffler, Töni Gujan e Marc Sonder.



La presidenta da la pastreglia Karin Niederberger cun Andreas Iten da l'Uniun purila grischuna.



Er quest onn chaschiel da qualitad superiura.



Curdin Foppa (san.) l'antier manader dal post da l'economia d'alp, en discurs cun in pur ed ina pura.



Ina gruppa da la Purtenza che admira il chaschiel.



In tgit en la rangaziun cun ils puncts retschets conferma la buna qualitad dal chaschiel.